



Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 7

Yangia anidakangma :



Tir Yimiyim



tiryimiyim@aolima



tir yimiyim

TAPAK 3

Israel-i Yemen nung Houthi telok tamendakdak amak

Kobi meli Centre sorkar chireptsü: Mamata Banerjee



VOL. XXI ISSUE NO. 279 (ADOK 279)

DIMAPUR TENTONÜ (MONDAY)

CHITENI (JULY) 22, 2024

₹ 5.00

BJP den yariteper temi special status meshir; Opposition-i NEET, Manipur onüktem jembinür

New Delhi, July 21, 2024 (Agencies): Hombar nungi Parliament budget session tenzüksü lia tanü party ajak senden ka menogo aser idangji Bihar, Andhra Pradesh o Odisha atema special status tebilemtsü kanga jembitepa liasü.

Defence Minister Rajnath Singh menden ser amenba senden nung Bharatiya Janata Party (BJP) den tesüiba nung yariteper temi- Biju Janata Dal (BJD) aser Yuvajana Sramika Rythu Congress Party (YSRCP) den NDA nung yariteper Janata Dal (United) ajanga pei pei state tem atema special status meshia takhangba agütsü.

Külen, Opposition nung adener Rashtriya Janata Dal (RJD)-ia Bihar atema special status meshiba pusema jembü.

"Bihar-i special state jenjang angutsüla. Ozü party tenzükli nungi onoki iba takhangba agüja arur. Chief Minister Nitish Kumar-i iba takhangba atema rally tulu aika ayonga agiogo. Sorkari iba mapa ya meinyaktetsü ta süra Bihar atema special package ka onoki meshiogo. Onokisa Bihar nung tzümetsüng timtem lemsatepogo" ta JD(U) MP Sanjay Kumar Jha-i ashi.

Ajisüaka, Andhra Pradesh nung BJP den yariteper aser YSRCP den tokteper Telugu Desam Party (TDP)-ibo onük atema ola kecha madok ta Congress lennir Jairam Ramesh-i ashi.



Parliament budget session tenzüksü lia July 21, 2024 nü all-party senden ka ayonga amendang agiba noksa angur.

BJD ya tang Opposition nung dena lir aser tanü senden nung parnoki Defence Minister Rajnath Singh aser Rajya Sabha Leader of the House J.P. Nadda na dang BJP 2014 manifesto nung Odisha nem special status agütsütsü nangzükba nenshia metetdaksü.

"Odisha nem küm 20 tema special category status magütsü arur. Bihar aser Andhra Pradesh nungi political party temia pei pei state tem atema special category status meshiogo" ta BJD MP Sasmit Patra-i ashi.

"Onoki tanga onük ka ano benokbaji Odisha atema coal royalty meyipa mereprangba lir. BJD-i centre nungi senotsü agütsüba ajema akümba aser iba atema inyaksü shiogo. Odisha Governor jabaso dak mapa kecha meinyak lir. Oai Raj Bhawan nung inyaker ka züka merenshi aser iba ya taoksatsüka lir. Odisha nung ozüng shitak mebenshir" ta Patra-isa ashi.

"Onoki Andhra Pradesh asoshi special status aser state nung ozüng mali akümba onüktem lemsatepogo. Onoki Centre sorkar dang state nung President's rule benoktsü mepishiogo" ta YSRCP lennir aser Rajya Sabha MP Vijaysai Reddy-ia ashi.

"TDP-i special category status atema mejembir. Parnoki nübortem taginübatem atema meinyaker" ta Reddy-isa ashi.

Tanü party ajak senden nung opposition party temi Centre dang Kanwar Yatra tetuyuba amala telemsa adokdaksüba mapa meinyaksü shiogo. Uttar Pradesh nung Yogi Adityanath'er sorkari Kanwar Yatra tetuyuba agüja lir.

Senden nungsa Congress lennirtem- Jairam Ramesh, K. Suresh aser Lok Sabha nung Congress deputy leader Gaurav Gogoi nungeri Opposition nem Lok Sabha Deputy Speaker menden agütsütsü ashi.

2014 matongdang Atal Bihari Vajpayee-io aniba NDA sorkar nungi Manmohan Singh kübok UPA (United Progressive Alliance) sorkartemi iba ya inyaka aruogo ta Congress lennirtemi ashi.

Gaurav Gogoi-isa Parliament nung NEET ken o aser Manipur amala onüktem benoka jembitsü takhangba agütsü.

Uttar Pradesh sorkari Kanwar Yatra lenmang nung hotel aser dokantemi kibur tenüngtem sayutsü tetuyuba agütsüba aitsür ta Samajwadi Party (SP)-i metetdaksü.

Iba tetuyuba ya BJP den yariteper Jayant Chaudhary, Rashtriya Lok Dal (RLD) aser Union minister & Lok Janshakti Party (Ram Vilas) lennir Chirag Paswan naprongi aitsüogo.

Iba ama lemetajanga loktiliba nung telemsa talila adoktsü ta SP lennir Ramgopal Yadav-i ashi aser iba onük nung Aam Aadmi Party (AAP)-ia SP pusema nungit.

All-India Majlis-e-Ittehadul

Muslimen (AIMIM) tanishir Asaduddin Owaisi-ia iba onük atema jembü.

"Sorkar kari danga Constitution anema tetuyuba ka agütsüra India sorkari iba atema mapa inyaksüla. Iba ama tetuyuba ya Article 17 alema lir" ta Owaisi-i ashi.

Opposition party temisa budget session nung Manipur tensa nungi tenzükter mapa manguba, NEET paper temai adokba aser mapang shia train lendong atalokba onüktem benoka jembitsü shiogo.

July 22 nungi Budget Session tenzüksü aser August 12 tashi nung session 12 tashi amentsü sentong lir.

PM Modi-i aniba sorkar kümsük tasembuba nung July 23 nü mezüngbuba full budget sayatsü aser session mezüng anogo nung The Economic Survey 2024 benoktsü.

"Linük nung ozüng amertem tim mesüi amshiba, aluyimertem timtemba, mapa manguba khuret aser jenjang atuba, Manipur, train lendong. Onoki item onük ajak benoka jembinür" ta Congress lennir aser Rajya Sabha MP Pramod Tiwari-i osangbener dang ashi.

Tanü senden nung Trinamool Congress (TMC) MP tem maden kechiyong parnok July 21 Martyrs Day rally nung aden.

1993 küm Kolkata Police-i Congress pusemer 13 kshetba bilemteta TMC-i kümshia iba anogomong amonger.

Bangladesh Supreme Court-i quota ajemtsüogo

New Delhi, July 21, 2024 (Agencies): Bangladesh nung sorkar mapa nung shilem lezmüksüba anema lungkak aityonga aruba agi tensa kanga mejungi lia Supreme Court-i Deobarnü sorkar mapa atema quota ajemtsü lemetetogo.

Sorkar mapa 93% tashi merit atema yutsütsü aser tanünga 7% ji telemsa balala atema lezmüksütsü. Iba nung Bangladesh Liberation War of 1971 nung rarartem nungi jakzükertem dena lir ta Supreme Court-i tetuyuba agütsüogo.

Tesüiba nung war veterans kinungertem asoshi 30% lezmükja liasü. Bangladesh nung tawa tu kaketshirtemi sorkar mapa nung reservation system tajungba yanglushiang ta takhangba agüja lungkak aitsü tenzük.

Ajisüaka, tensa kanga mejungi akümba ajanga sorkari Honibar nungi linük ajungalen curfew alitsü ozüng agütsü aser Dhaka

nung tensa anepalutsü atema sepaitem mapa lezmüksütsü.

Tatalokba balala nung nisung aika taküm samaogo saka Bangladeshi ketdangsurtemi tang tashi nung tasürtem aser yirurtem osang memetdaksüi lir. Ajisüaka Honibarnü 'Prothom Alo' ta ajaba osangkaket ajanga nisung 103 shi asüba metetdaksüogo.

Bangladesh nung tensa majungba atema West Bengal Chief Minister Mamata Mamata Banerjee-i lar state nung refugee tem agizüksü mulunga aliba metetdaksüogo.

"Bengal-i nungdakbapurtem jenokdaksütsü" ta lai ashi.

"Ni Bangladesh indang ken o atema mejembitsü kechiyong parnok linük balaka lir aser kechi nungdak adokdir parnoki Centre den jembitsü. Saka teyarir maliba nisungtem Bengal-i arura onok parnok anenzükdaksütsü" ta Mamata-i ashi.

Tanü Parliament nung Economic Survey benoktsü

New Delhi, July 21, 2024 (Agencies): Union Finance Minister Nirmala Sitharaman-i Hombarnü Parliament nung Economic Survey benoktsü.

"July 22, 2024 nü Parliament nung Economic Survey of India benoktsü. July 23, 2024 nü Union Territory of Jammu and Kashmir atema Budget benoktsü" ta tanü Union Minister of Parliamentary Affairs of India Kiren Rijiju-i ashi.

Tan Parliament budget session nung Sitharaman-i Union Budget tenetbenbuba sayatsü saka ibaji masüdag lai tamasa Economic Survey lemsateptsü.

Tesüiba kümtem inyaka aruba ama 2024 Union Budget ya paperless format nung sayatsü. July 23, 2024 nü Union Territory of Jammu and Kashmir atema 2024 Budget benoktsü.

Economic Survey ya Ministry of Finance nung Department of Economic Affairs kübok

Economic Division ajanga renem.

India nung mezüngbuba Economic Survey ji 1950-51 nung tenzük aser budget documents nung shilem ka ama agia aru. 1960s nung iba ya budget documents nungi pila aser Union Budget sayatsü anogo ka jelia benoka arur.

2022 küm Economic Survey indang omenji 'Agile Approach' liasü aser iba ya India-i Covid-19 sülen rongsenketzüng tsütsü mapa inyakba nung ranglok.

2023 nung omenji 'Recovery Complete' liasü. Russia-Ukraine rara mapang rongsenketzüng jenjang tajungba akümba aser Covid matongdang aliba ama merangba atema iba omen ya amshi.

Taküm Budget ya Prime Minister Narendra Modi-i aniba sorkar kümsük tasemben atema takok ngur mezüngbuba policy announcement asütsü.

Finance Minister Nirmala Sitharaman-i taoba Prime Minister Morarji Desai-i yangluteta aliba otsü ajatetsü. Morarji Desai-i 1959 aser 1964 tsüngda Finance Minister ka ama annual budgets 5 aser interim budget ka sayaa liasü.

Sitharaman-isa Manmohan Singh, Arun Jaitley, P. Chidambaram aser Yashwant Sinha nungeri inyakba ajatetogo. Par pezüprongi Union budget pungubenben sayaa liasü.

Reserve Bank of India (RBI)-i tawa tu financial year 2024-25 atema GDP forecast 7% aliba nungi 7.2% asütsü ta shiogo.

Külen, International Monetary Fund (IMF)-ia 2024 küm India GDP 6.8% nungi 7% akümsü ta metetdaksüogo.

Taruba küm asem tsüngda India ya alima nung third-largest economy akümsü imlar. 2030 tashi nung India ya USD 7 trillion economy akümsü akok.

Nagaland Madrigal choir-i gold medal ana angu



Nagaland Madrigal choir

Dimapur, Chiteni/July 21 (TYO): 13buba World Choir Games 2024 nung Nagaland nungi Madrigal Choir-i gold medal ang ngua India nem kongnang tetushi bener arutsüogo. Iba tetoktepba ya New Zealand nung agia liasü.

Parnoki takok tajung anguba sülen Nagaland Chief Minister Neiphiu Rio-i X ajanga parnok nem tenüngsang agütsüogo.

"13th World Choir Games 2024, New Zealand nung India atema Gold Medal ana ngutsüba atema Nagaland Madrigal Choir nungi kentenertem nem tenüngsang agütsür. Linük nem konang tetushi bener aruja nenoki onok tejangraba ataloktsüogo aser onok ajak kanga nema dangdaktsüogo. Tarutsü

nunga nenoki takok tajung nguyonga aotsü imlaja atar," ta Rio-i iba social media sabang ajanga lemsatöp.

Madrigal Singers' temi iba takok anguba ajanga parnok dak sempet tajung aliba sayuba dang masü saka choral music luyim nung India alima sabang nung toktsüogo.

Iba telok ya 2023 küm September ita Hito Kiho-i tentet shiba iba ensemble indang conductor lir. Iba telok nung nüngtugu music conservatory tem nungi graduate asüba kentenertem adenshia lir. Züngsem ajaki parnok professional training agiba mapang tangazükbatem bener adenshia lir aser iba ajanga parnok mejeta kanga junga kümdaktsür.

Nagaland Madrigal

Singer temi ken tapu balala aika atener. Parnoki atenba kentem rongnung intricate classical choral aser sacred music tem densema lir.

Iba telok yagi Asian nung sobaliba aser Naga nung sobaliba ken atener aser iba ajanga parnok jakzükdak teprangertem nem metetdaktsür. Maneni parnoki folk songs, contemporary pieces, adser popular music tema atener aser iba ajanga parnoki ken tapu balala kanga junga tentetba sayur.

Kiho lenisüba nung Nagaland Madrigal Singers temi parnok ken ajanga nüburtem atsüa arur aser kenten yimya balala ayong ayonga atentsü parnok dak sempet tajung aliba sayur.

Manipur nung college kaketshirtem yimya-yimpong azüoktsü atema committee ka tentet **Imphal, Chiteni/July 21** aitsü asoshi tangatetba ka agütsütsü.

(TYO): Sorkar aser sorkari teyari agütsüba college principal tem senden ka Shantikumar Singh, amenba sülen Manipur Chief Additional Director (UHE)-a Minister N Biren Singh-i densema lir shiba convener sangdong ka ajanga, kaketshirtem yimya-yimpong aser shisatsü tajungba kümdaktsütsü atema züngsem ti agi kümteba committee ka tentettsüba sangdongogo.

Iba committee ya University and Higher Education (UHE) Director Dr Rangiabali Waikhom mendenbuba sür inyaksangshitsü aser parnoki college tem nung sobaliba dak ajemdaker y i m y a y i m p o n g t e m ajungketba den kaketshirtem shisatsü renlok daktsütsü atema jenjang tapet agütsü.

Inyakyim rongnung tongtimbang kaji anogoshi assembly nung kaketshirtem ajak dendaktsütsü asoshi asütsü, kong linük naklo ken aser state ken atenba densema alitsü. Iba ajanga kaketshirtem mulung nung yimya-yimpong tajung benshitsü aser linük meima

Iba committee nung P Shantikumar Singh, Additional Director (UHE)-a densema lir shiba convener asütsü. Iba committee nungi ketdangsürtem kaketshir aser staff tem attendance aser anogoshia assembly agir magir aji asadnagtsü atema district balala nung college tem semdangtsü asoshi yoktsü.

Item ketdangsürtem yagi hopta shia committee mendenbuba nem osang agütsütsü. College principal temi item ketdangsürtem nem tenüngdakba osang agütsütsü atema khuret nongloktsüogo.

Maneni committee züngsemtemi college tem ajungbena semdanga attendance aser assembly inyakyim asadangtsü. Parnok ita nung anaben ajurutepa telok aser züngsem balalai bendenba osangtem asadangtsü.

Iba sülen ita tepeyong atalokbatem indang osang sorkar dangi abentsü.

Manipur nung Myanmar nungertemi lumia longka ai tenzükogo

Imphal, Chiteni/July 21 (Agencies): Manipur nung detention center balala nung aliba Myanmar nungertemi parnok chioktsü khanga lumia longkak ait tenzükogo.

Iba dak sendakba nung Manipur Central Jail Superintendent Sorokhaibam Bhadraka-i, Honibarnü osang benertem den sensaksemba mapang, Manipur Jail authorities dak parnok chioktsü atema tashi mali, kechiyong parnok ya Foreigners Act kübok Section 14 dak ajemdaker court-i obendang agütsüogo, ta ashi.

Jail SP-isa, detention

center tem nung sota alirtem ya Myanmar embassy-i temelaba agütsüba sülenang par linüki meyipa yoktettsü, ta ashi.

Detention center tem nung alirtemi parnok Moreh nung chioktsü akhangba dak sendakba nung SP-i ashiba agi, parnok takhangba mataloktsütetsü, kechiyong iba ya Manipur Central Jail authority kübok masü saka Manipur sorkar policy kübok lir. Moreh ya Myanmar den arrtsü nung India indang tatembangbuba jila lir, kong parnok pua liasü.

Maneni Spi-i ashiba agi,

temzüng ozüing dak ajemdaker Myanmar nungertem anepaludar aser state nung tzü agi anünga mapanga parnok nem tzü temerek teperi, tajemtsü tsü aser tanga tenüngdakbatem peria agütsüdar.

Paisa, sota alirtemi parnok kinungertem den video call ajanga tongtepratepa arudar, ta shisem.

Temetetsü kaji tetsür aser tanur densema Myanmar nung 5000 shi kuli kaketsü tejangia mebeni Manipuri ait aser parnok state kübok detention centre balala nung jenoka liasü.

Jharkhand-i Assam nem sen crore 2 agütsü

Guwahati, Chiteni/July 21 (TYO): Jharkhand Chief Minister Hemant Soren-i, Assam nung tawa tzümettsüing agi kanga mejungi kongshir alirtem atema state nem sen crore 2 tenla agütsüogo.

Assam Chief Minister Himanta Biswa Sarma-i iba tenla agütsüba indang ya Twitter ajanga sangdong aser Assam nung aliba nüburtem tenüng nung kanga pelaba lemsatapa liasü.

"Jharkhand CM Hemant Soren-i, tzümettsüing agi kongshir alirtem nem teyari agütsütsü atema Assam Chief Minister's Relief Fund nem sen crore 2

tenla agütsüogo. Assam nung aliba nüburtem tenüng nung iba mulungso tenla agütsüba atema Jharkhand nung aliba nüburtem aser Chief Minister dang kanga pelar," ta Sarma-i tweet asü.

Assam nung tzümettsüing agi kongshir nisung meyirejang aika pei talidak ki toktsü jenshia orr aliba mapang tang iba tenla ya agütsüogo. Jharkhand-i senotsü teyari agütsüba ajanga tekümüzkba aser teyari agütsüba inyakyim nung teyari tulu agütsütsü imlar. Iba inyakyim ajanga lendong mapang India kübok state balala tsüngda telungjem aliba tali jungkai adoka sayur.

ANTI DENGUE MONTH

JULY 2024

THEME "CONNECT WITH COMMUNITY, CONTROL DENGUE"

MERILA POKTETBA TESEM TZÜ BANGDAKA ASER RIZÜNGA ALIBA TESEM

TZÜBOT/TZÜTA AWATSÜNG

TZÜ BANGDAKA ALIBA KILENTZÜ

PONGDANG ASER TYRE TEM

NARO POT ASER PLANTER

DRUM/TZÜBO MENEMBANG ALIBATEM

TZÜ COOLER DISPENSER

TASHIDAK KETA ALIBA TEMAITSTÜTEM

- TEMANG KANGAMETA SHIRANGBA
- TEKOLAK KANGA MENÜBA
- TENÜK TESÜLEN ASHIBA
- ARAADOKBA
- SAKTSÜBA
- TETSÜ ASER TELOKTEP AYANGBA

TASHIDAK KODA NOKDANGTSÜ

- NA MEKETA ALIBA TESEM MEREKA YUANG
- REPELLENTS AMSHIANG
- MERILA SÜ AMSHIANG
- TEMANG AJUNGA NEMBANGBA S POTS CONTAINER & TYRESOSHI SEMANG
- TZÜ BANGDAKA ALIBA MEREKTETANG
- KISHI, VENTILATOR ASER KICHIBA MESH AGI NEMBANGANG

District Hospital Dimapur, Naga Hospital, Kohima aser Mon District Hospital amala Sentinel Surveillance Site Hospital ajak nung Dengue tashidak ANGATI agi tendangtsütsü.

FOLLOW US @nhmnagaland @NagalandNhm THE Chief Medical Officer's Office, Nearest Health Center.

Tzüngluruwa mongpu Parliament jelia party ajak senden amen



July 21, 2024 nü New Delhi nung Union Defence Minister Rajnath Singh, Union Minister for Parliamentary Affairs Kiren Rijiju aser Union Minister of State for Parliamentary Affairs, Arjun Ram Meghwal nung party ajak senden nung adentsü atema aodang tangokba noksa nung angur. Tzüngluruwa mongpu Parliament senden tenzüksü anogo ka lia sorkari party ajak senden ka ayongzüka menogo.

New Delhi, July 21 (Agencies): Tzüngluruwa mongpu Parliament senden tenzüksü jelia Amongnü sorkari party ajak senden ka ayongzüka amen aser iba senden nung mendenbubaji Union defence minister, Rajnath Singh liasü.

Parliamentary affairs minister, Kiren Rijiju-i Parliament senden nung jembitsü aliba onük balala lemsatepsü asoshi party balala nungi floor lenirtem senden ayongzük.

Senden tembangba sülen Congress lenir, Jairam Ramesh-i X ajanga, senden nung JD(U) lenirtemi Bihar atema temeja maongka akhang aser YSRCP-ia Andhra Pradesh atema kasa takhangba agüja liasü, ta metetdaksü.

Ramesh-isa, "Tanü Defence Minister Rajnath Singh mendenbuba ser amenba party ajak nungi floor lenirtem senden nung JD(U) lenirtemi Bihar atema maongka balaka akhang aser YSRCP lenirtemia Andhra Pradesh atema temeja maongka akhang. Mamangtetsüsa TDP lenirtemibo iba onük nungji ola madok," ta metetdaksü.

Party ajak senden nungji lenirtemi Department 24 dak sendakba Standing Committees tentettsü atema takhangba agüja liasü, ta Ramesh-i metetdaksü.

Kasa senden nung Congress MP aser Lok Sabha nung deputy lenir, Gaurav Gogoi-i

NEET tatidang nung ochimashi, ED aser CBI ama central agencies tim mesüi amshiba onüktem benokba den külemi Deputy Speaker menden meshia liasü.

Party ajak senden nungji party 44 nungi lenir 55 aden.

Parliamentary affairs minister Kiren Rijiju-i, "Onok senden junga katetogo. Tebilemba onük tajung aika benokba atema ni party ajak nungi floor lenirtem dang pelar. BJP densema party 44-i iba senden nung shilem agi. Onoki floor lenir ajaki lemsatepba tebilemba onüktem angadangogo. Parliament senden junga katettsü atema teinyaktsüji sorkar aser opposition naprongla shilem lir," ta metetdaksü.

Rijiju-isa, "Defence minister Rajnath Singh-i, onoki democracy tashi itdaksütsü atema inyaktsü ta ashiba den külemi Parliament nung züngsem mashie kati jembidang asenoki timtem magütsütsüla ta mepishiogo. Special session nung Ato kilonser Modi-i jembidang Lok Sabha aser Rajya Sabha naprongla nung timtem agüja liasü. Rajnath Singh-i, ibaji Parliamentary democracy atema majung ta shiogo. Ato kilonseri jembidang House aser linük nüburtemi angaa atatsüla ta pai ashi," ta metetdaksü.

Hombarnü nungji tzüngluruwa mongpu Parliament tenzüksü

aser August 12 nü tembangtsü. Iba senden alidang sorkari küm 90 tejaklen benokba Aircraft Act ozüng melentsü atema Bhartiya Vayuyan Vidheyak, 2024 bill densema bill tasen trok benoktsü tebilemba lir.

Centre sorkarisa Jammu and Kashmir atema budget agizüktsü tebilemba lir.

Centre sorkari disaster management ozüng yanglushitsü atema bill ka, The Boilers Bill lir, Coffee (Promotion and Development) Bill aser Rubber (Promotion and Development) Bill tem benoktsü.

Taruba Parliament nung sorkari Banking Regulation Act, 1949 yanglushitsü, Banking Companies (Acquisition and Transfer of Undertakings) Acts of 1970 aser 1980 yanglushitsü atema bill benoktsü tebilemba lir, ta ketdangsertemi metetdaksü.

Amongnü sorkari ayongzüka party ajak senden nungji Congress nungi Jairam Ramesh aser K S Suresh na densema lenir kar, AIMIM tongti lenir Asaduddin Owaisi, RJD nungi Abhay Kushwaha, JD(U) nungi Sanjay Jha, AAP nungi Sanjay Singh, Samajwadi Party nungi Ramgopal Yadav aser NCP nung Praful Patel nungera densema liasü.

Mongolbarnü Union Finance minister, Nirmala Sitharaman-i Union Budget benoktsü aser Hombarnü Economic Survey benoktsü.



July 21, 2024 nü Chennai nung Tamil Nadu Congress Committee Tir, K. Selvaperunthagai den party lenirtemi Congress National Tir, Mallikarjun Kharge asoba anogomong amongdang tangokba noksa nung angur. Amongnü Kharge arrshi küm 82 jungogo.

Kobi melii Centre sorkar chireptsü: Mamata Banerjee

New Delhi, July 21 (Agencies): Amongnü Kolkata nung Trinamool Congress (TMC) Martyr's Day rally nung jembidang West Bengal Chief Minister, Mamata Banerjee aser Samajwadi Party tongti lenir, Akhilesh Yadav napronglai, Centre nung BJP-i aniba sorkar anogo züngdangteta dang lir; kobi melii sorkar chireptsü, ta metetdaksü.

Mamata-i, BJP-i amokmerena sorkar tenteter aser parnok laotsüji temetet dang, ta ashi.

Laisa, "Centre nung sorkar mapang talangka malitsü. Iba sorkar ya tashimait aser kobi melii chireptsü," ta metetdaksü.

Taoba mapang Uttar Pradesh Chief Minister aser Samajwadi Party tongti lenir, Akhilesh Yadav-i, "Tanü anogo ya party nung inyakertem bilemetba anogo ka lir," ta ashi.

Centre nung BJP-i aniba NDA sorkar aija Yadav-i, "Ni iba ya tamalen Lok Sabha nunga jembiego aser tanüa kasa o jembir- Centre sorkar taküm malitsü. Sorkar chireptsü aser asenoki tepela anogotem angutsü. Bengal nung nüburtemi BJP den rara aser parnok

tesülen atsüngzüka yutsü. Kasaji Uttar Pradesh nunga atalokogo. Delhi nung amenoka aliba sorkar nung alirtemji anogo ishika atema dang alitsü. Iba sorkar oadoktsü, iba sorkar alangtsü," ta ashi.

TMC Congress tongti lenir, Mamata-i, "Tetsür MP shilem 38 aliba party ji Trinamool Congress dang lir. Election matongdang aikati yimtenren nung tetsürtem nem menden shilem 33 agütsü ta jembisa saka yamaji meinyaktet. Yimtenren nung tetsür nem shilem 38 tashi agütsütetba party ji ozü party dang lir," ta metetdaksü.

1993 küm West Bengal Youth Congress-i Kolkata nung longkak aidang nisung 13 khasetba bilemettsü atema Trinamool Congress-i küm shia 'Shahid Diwas' amonger.

Kasa sentong nung jembidang TMC lenir, Abhishek Banerjee-ia NEET tatidang nung ochimashi balala atema BJP aser Union minister Dharmendra Pradhan na aitsü.

Abhishek-i, West Bengal Lok Sabha election nung BJP-i tamakok mejungi angu, kechiyong parnoki takok angutsü atema central agencies aser sen tashi dak metaloker, ta ashi.



July 21, 2024 nü Satara district nung NCP (SP) Working President, Supriya Sule aser tangartemi Maharashtra nung mezüngbuba chief minister inyaksang, asür Yashwantrao Chavan nem akhüm agütsüdang tangokba noksa nung angur.

2050 küm tashi nung teintet nütsüng anasü agi teimba akümtsü

New Delhi, July 21 (Agencies): 2050 küm tashi nung India nung kanga teintet nütsüng tang aliba dang nungi anasü agi teimba akümtsü, ta Amongnü UNFPA India chief, Andrea Wojnar-i interview ka nung jembidang metetdaksü.

Laisa, kanga teintet senso tetsürtem aika kija alitsü aser sensak tia ajurutsüa akok, ta ashi.

Mongolbarnü Parliament nung Union Finance Minister, Nirmala Sitharaman-i Union Budget 2024 benoktsü lia Amongnü Wojnar-i, sorkari healthcare, housing aser pension schemes nung sen tali indoktsü nungdaker, ta ashi.

Tang India nung arrshi küm 60 ser temapurtem nütsüng million 153 lir aser 2050 küm tashi nungbo item nütsüng million 346 shi akümtsü, ta lai metetdaksü.

Yimtsüngtem nungi aika jila/ yimtitemi oa litepba dak sendakba nung Wojnar-i, "2050

küm tashi nungbo India nung tesem shilem 50 bo jila/yimtitem asütsü, smart cities yanglutsü aser infrastructure terenlok junga alitsü. Sensakertem aliba tesemtem 'slums' ajungkettsütsü, mopung menenba azüoktsü aser alima wazüka ayutsü atema jenjang dalang agi ki agütsütsüji kanga tongtibang asütsü," ta lai metetdaksü.

"Jilatem atema asalentong renemdang tetsürtem kümzüka alitsü, health care, mapa aser shisaliok tajung agütsütsü-a züngoktsüla. Tetsür-tebur kasa züngshiba ajungkettsütsüla aser taküm libaliro tsütsü lenla ajak tajungba akümtsü atema inyaktsüla," ta laisa shisem.

Climate change dak sendakba nung Wojnar-i, climate change ajanga meimchirtem soyapokyaba health nunga mejungi kongshitsü, tanur abentsü atema tasak asütsü aser mashisa alidang timtem ajangshitsü, ta metetdaksü.



TIR YIMYIM YIMOBILEM (EDITORIAL)

DIMAPUR TENTONÜ, JULY (CHITENI) 22, 2024

Constituency aika asüba agi masü!

Aginüyonga maginüyonga mapang agi atonger asünungji, memenui Nagaland nunga legislative assembly nung amentsü atema tatar 60 shimba constituency-tem ya asetshiteptsü asoshi tangar state-tem nung agiyonga aruba ama 'delimitation' mapa tenzüksü. Delimitation tetezü tang kümteta aliba constituency-tem nung nütsüng renlokba aser ajemba apir akok tashi constituency shia nütsüng yongsük kasasa asütsüsa lemzükshitsüyonga aotsü. Idangji, tang aliba constituency kar lushibo tuluba akümtsü saka kar lushibo tilaba akümtsüsa adoktsü, kechiyong constituency asetshitepba mapa yabo alinük tasazük agi masü saka nütsüng yongsük agidang bendangtsü. Shitakbabo India lima yimten nüchiso ngur külen parliament aser state assembly constituency-tem ya 1951 küm nungi küm ter shia nütsüng yongsük sükdanger külen, iba nütsüng yongsük dak amendaker constituency shia nütsüng kasasa asütsüsa jenjang ka lateta yurbo iba yari constituency latetshiyonga aru, anungji idangjiبو nütsüng renlokba yari constituency-a teimba akümtsüsa aküm. Aji oda, mezüng linük nung Lok sabha atema delimitation agidang 1951 küm India nung nütsüng yongsük crore 36.1 atema constituency 494 yanglu, iba sülen 1961 küm nütsüng yongsük crore 43.9 liasü, anungji constituency 522 aküm aser ano 1971 küm nütsüng yongsük sükdang dangbo nütsüng yongsük ajak agi crore 54.8 liasü, anungji ano Lok sabha atema parliamentary constituency 543 aküm. Iba amaji linük nung küm ter shia nütsüng yongsük sükdangli aser iba yari constituency asepsi dang nütsüng yongsük renlokba yari constituency-a renloktsüsa akümba mapa yagi India nung memetetika linük rongsen aser chiyongtsü jenjang nung timtemi aitsüsa nütsüng talila renlokba puteta, 1971 küm agiba census sülenbo 2000 küm tashi linük nung nütsüng yongsük sükdangba aser constituency delimitation mapatem ya khen anena liasü. Aji oda, constituency renloktsü mechi nütsüng merenlokdaoktsü atema küm 30 linük nung nütsüng yongsük mesükdang arur 2001 küm sükdang dangbo India nütsüng yongsük, joko, billion ka dak tali kümer liasü aser ano küm ter lir külen 2011 küm sükdang dangbo linük nung nütsüng yongsük 17.69 % agi talila renloker liasü. Tesümgangtsü kaji, 2011 küm census nung tangar state ajak nung nütsüng 17 % dak tali jagi renlok dang, Nagaland-bo renloktsü melen tajemang 0.58% agi ajemer liasü. Atangji, ibaji Nagaland nung tanur kata masoba agia masü mesüra tasortem dang nungi tasürtemang teimba asüba agia masü mesüra Nagaland nung mapa inyaksü bushia arua tangar ayangertem arua maliba agia masü saka 2001 census nung meshitaki inyakba ajanga liasü, kechiyong Nagaland tesem aika nung 2001 küm sükdangbo census nungbo nütsüng yongsük dang nungibo voter teimba liasü, anungji aji yanglushi dang küm ter sülenbo nütsüng tajemba küma sükdangtetsüsa atalokba liasü. Atangji, 2001 küm census yabo asenok asoshi Ochi subject nung tatidang agütsüba nung tamakok anguba küm amato ka liasü. Item timtem jagi tanga state-tem nung delimitation agiaka tang tashi Nagaland nungbo magiteta lir. Ajisüaka, 2026 tashi nungbo Nagaland nunga nütsüng yongsük ken sükdanger delimitation mapa tenzüksüsa linük temzüng Amendment 84 ajanga lateta lir, anungji küm ana tsüngda asen lima nunga constituency yanglushitsü anendaka lir. Ashiko, akhi ama nütsüng yongsük sükdangaka constituency teimba mesüra tajembabo mekümdaktsütsü südi saka constituency shia nütsüng yongsük kasasa lemzüksütsü merangdang, district kar nung constituency ajemtsü aser kar nung renloktsüsa akümtsü. Ano, Nagaland yabo district shia ya, Dimapur aser Chümoukdima na dak alaka, kin temeja kaka agi küma lir, anungji district ana kongshia constituency ka akümtsübaji tasak asütsü. Kechikomaka inyakdir inyakang, nütsüng aika süra iba district nung constituency aika asütsü aser nütsüng ajema lira iba yari constituency-a ajemtsü. Ajisüaka, yimten tashi amshia yimsüsütsüba yabo constituency aika asüba agi masü saka ochishia inyakba agi, tangari temulung lemtetsüsa aliba agi aser tangar dang nungi temetetba aser tajungba asüba agidang lenir küma yimsü sütetsü.

OLEMSABANG

MAPA TULU INYAKDI SAKA O AJEMA JEMBIDI

~ L. Kika Pongener.

Asen Naga nung dak aketba tashimait mekokmein aika dang lir, saka item ajak rongnung tashimaittiba kaji...O-bo tulu jembitsü saka mapabo jembiba ama meinyaker. O-o mapa na khenyongi meputep. English nung shin o nung ashir... "Mapa tulu inyakang, saka o-bo ajema jembiang". Ano tanabuba Naga nung dak aketba tashimait kaji, mapabo meinyaknur saka chiyongtsübo shi-ango dang chinur. Chidiyungdiba ya asen Naga nungeri konang ka amai bilemer. Ano tasembuba Naga nung dak aketba tashimait kaji, pei jenjang dak alia ulua bilemba ya asütsü. Asen Naga nungeri kanga anganuba 'olong' ka lir aser aji tsümar oshi nung 'Saheb' & Mim-Saheb' ta ajaba ya lir. Hau-niii...Shirnok dang ibaji ajatsü langa lir ajibo tim dang ajar ako...Asen Naga lima nung alir tzümartemi asen Naga nung jakla yimya ajak kanga junga lazüka lir, aser Naga nungeri kechi tasa agi kodaser meszüksü, aser parnok tebilemba tonga tajangzük angutsü, item tasa ajakji kanga junga meteta lir. Tatishitsü agi...Parnoki oset kar ayoktsüba atema asen kidangi arura, kima Compound ojita nungi sensaker-tilar ajunga dang 'Saheb & Mim-Saheb' ta ayima jaa arutsü, aser tamasa asenokji Tsüngrem kümja kanga sanga, ola-osu tanep agi nangnanga meszüka jembitsü....Idangji, asen Naga nung kibursang o kiburla na-to 'Saheb' o 'Mim-Saheb' ajaba jagi joka-tua pelaseter...Tsümar-sangi ayokba oset-ji asen nungdakba oset asü (?) Mesura menungdakba oset asü (?) aser jenjanga aseni akoktsü asü makoktsü (?)....ta kecha meshisadangi tenuk amour oset-ji odang alitsü.

Ano Naga nunger aika dak aketba jakla kaji, ken o kanga mekümdangi jembir. Tebilemtetba ajak tapi-tapi agi jembizüka yoker. Aji oda, o-ji tebilemtetba ajakbo mejembitsüla, karbo terok adena madokdaoktsü meyozküka yoktsüla. O aika jembiba agi nisung ka tashitemetet shisanger masü, saka mashi-memetet tali shisanger. Tashitemeteri o kanga kümdanga telemtet dang jembir. Ano Naga nunger karibo maka sernung kar ama o tulu jembir, aser idangji pei sasa timtem bendenloker. Ano asen Naga nunger dak aketba tashimait kaji, takar-tulur jilo benshidang, tangar dang sen tetemlok (Interest) agi apur, pei kibong dak malangba osettsüset alia amshir, pei kibong dak malangba apen-suoshi subor, pei kibong dak malangba chia-ajemer, chirnur nem pei kibong dak malangba osettsüset alia amshidaktsür, aser idangji tanem-tanemi kibong sensak tia-i ayir. Tesasatsüka, tanü Naga nunger kibong karbo kimong-lumong aser telidak ki ajunga sentsü-yong tangar keti oadoker kanga timtema aliba angur. Ano karbo temeimtsüka sentsüh agi tsühbanger kong alir'ar mejangjai jenshia senzüba-a lir. Item ajakji jungjunga shisadanga, pei sasa tali mashiba ajanga lir...Tilar-i tulur jilo benshira aser sensakeri takar jilo benshira, pei sasa timtem-ang talila bendenloktsü. Ano karibo tilaka metetba agi tuluka metet ama ulua bilemer. English nung shin o nung ashir... "Tilaka metetbaji lendong". Tashitemeteri aikati shia-meteta lir sernung memetet amai sayur, ano takar aikati kaa-ita peria lir sernung, kecha maka amai tongmelang taküm lia sayur.

Ano asen Naga nunger dak aketba tashimait kaji, libaliro ajak nung takar o sensaker na tebandang mali, tulur o tilar na tebandang mali libaliroba ya asütsü. Tanü putu nung asen Naga nunger aikati mera ishika, mesura lenmang tatsüka tetsüng agi jaja-a aotsüa, tila akümer amai, jenjang alur amai, mesura maaksu amai bilemer. Asenoki asen tsürabur tia to khen meyipa bilemdanga, azüng-lu lenmang talang nungi tsük tekolak nung bener adoka semki nung sener chiyunga-jema mesua inteter chirnurtem sernung...Mera ishika tetsüng agi jajatsü maaksu amai bilemer...!!!??? Ano kanga-sa tamashi tangatetba kaji, kati ka dang akümtsübutsubaji maaksu amai aser jenjang alur amai bilemer. Ajemalua tila akümbaji maaksu amai bilemer. Otsüla-oboula nunger lia aruba sobaliba tajung kaji, takari sensaker nem tsükdem agüja chiyungdaoktsü aser sensakeri takar dang tenya-ashi angaa tenzüka aru. Putu yimsüsüri nung-nubur dang asü-anguma meim aser nuburtem-ia Putu yimsüsür dang akümtsübo. Kenshi-oshiri mashi-memeteter dang shisa len sayu, aser mashi-memeteter kenshi-oshir dang akümtsüsa tenzük aser parnok dang nungi shisatsü angazük. Tantsür-tambur dang tanütsür-tanübur akümtsübu bensi aser maparen ajak nung tantsü-tambu nem tamasa yimli agütsü. Lemya-lemko nunga tantsü-tambu nem tamasa yimli agütsü aser lokti-senden nung menden tazüng malidanga tantsür-tambur kar arura, tanütsür-tanüburtemi pei amenba menden azüngteter parnok mendaktsü. Alu talen lenmang nung tantsür-tambur kar khu bener denjira, parnok khuji melenzüka aben. Aji oda, yamaji otsüla oboula nung kati ka züngshia kati ka dang akümtsütepa lia aru.

Ano asen Naga nunger dak aketba jakla tamajung kaji...Nisung aikati kanga asüküma libaliror...Tsüngrem o-i ashir, "Nisung ka asükemi pa teküpoki anizüksü, saka ajemalubai tetushi angutsü" (A.Shin-29:23). Aiben asenoki ken o-a tazüokba mali jembir. Nisung aikati temulong nung bilemba ajak kecha tesoitba mali kazüka yoker, aser idangji tangar aika yirudaktsür aser jashidaktsür. Tsüngrem o-i ashir, "Temeteteri pei o soiter, tesungjem mulongsentsü atenerji tangateter nisung" (A.Shin-17:27). Asen Naga nunger aikati pei jenjang dak alia, asüküma o tulu-lu jembir. Kidangbo kecha maka sur, tangar dang meshi-metsüa chiyunga-jemer asüküma o tulu jembir. Tsüngrem o-i ashir..."Nisung kati kecha makai yur pei sasa takar akümer; Tangar kati rongsen tulu yur pei sasa sensaker küma sayur" (A.Shin-13:7). Aji oda, tazünger-temeteter, tulur-takartemi ajemalua tila kümer, nisung ajak den küsasa liromedema liteter. Ajisuaka, mazüng-memeteter, mashi-malo nisungi shinga danga aküm-metsübur, aser pai/lai tilaka metetbaji kanga tuluka metet amai kanga asükema ulua bilemer. Anungji asenoki ajemalua tila akümtsü angazükdi....Mapa tulu inyakdi....Saka o-bo kanga ajema jembitsü angazükdi.

**Iba Olemsabang nung lemsaba ken-o aser shisatsü ya iba ocet züluri
bilemba ken-o ama tazünger angateta agitsü mepishir**

Georgia nung küm 200 tejaklen asüba Tenla ki ka rongdok



July 21, 2024: Zebulon, Georgia nung küm 200 tejaklen asüba Zebulon United Methodist Arogo Tenla ki July 17, 2024 nü rongdokogo.

Bodhbarnü yipru sashia aيتدang tsüngi yaloktsüba nungi mi adoka iba Tenla kiji rongdok südi ta bilemer. Zebulon, Georgia nung state Fire Marshal-i iba tatalokba bushisüngdang tenzükogo.

July 17 nikongdang 4:25 ako meta Tenla ki arongba osangji Pike County Fire Department nem metetdaksüba sülen iba agency nung public information officer, Anita Neath leniba nung miji enseptsü meranga liasü.

Iba Arogo nung züngsem aser Zebulon nung Mayor, Joe Walter-i, Tenla kidang tsüngi yaloktsüba olaji jila tesem ajaklen nungi angashia liasü, ta metetdaksü.

“Tesüba küm 200 tashi iba jila nung Methodist Tenla ki ya liasü. Iba Tenla ki ya 1897 küm asü aser fellowship ki 1953 küm asü. Kechi südir süaka onoki iba Tenla ki süshitsü aser

maneni kasa tesem nungsa tekülem agitsü,” ta Walter-isa metetdaksü.

Iba Arogo nung pastor, Rev. Arianna Eberle-i, la Tenla kidang nungi aoba sülen minute 10 shi dang lirbo Tenla kidang tsüngi yaloktsü, aser Tenla ki rongdokbaji ngua la temelung kanga raksa, ta metetdaksü.

“Onük renemtsü atema ni Tenla kidang liasü aser Tenla kidang nungi pilaba sülen mapang tatsüka tsüngda phone ajanga Tenla ki arongba osangji kü nem metetdaksü. Ni arisanga Tenla kidangi ao nung Tenla ki rongka liasü. Ibaji ngua kü melung kanga raksa. Ni iba tesem nungji mener ajep. Ni angubaji ni mamangteti liasü,” ta pastor-isa metetdaksü.

Laisa, iba Tenla ki ya Khristantemi kanga meima liasü, kechiyong Pike County nung tekülem ki mezüngbubaji iba Tenla ki liasü, ta metetdaksü.

“Yangi mezüng Methodists-i Methodist Tenla ki asü aser tesülen United Methodist ta melena liasü,” ta laisa

Olympics asaya mapang nung Tasen Lai edition tasen lema agütsütsü

July 21, 2024: France nung Olympics asaya mapang nung nisungtem nem lema agütsütsü atema French Bible Society (FBS)-i Tasen Lai edition tasen ka renema adokogo.

Paris Olympic Games atongtsü mapang ana nung lia French Bible Society-i French oshi nung Tasen Lai 140,000 aser English oshi nung Tasen Lai 60,000 lema agütsütsü renemogo.

Tasen Lai lema agütsütsü baji ajanga asaya moapu adener tesem aika ayimjema senmang tajung ka yutsütsü, ta French Bible Society-i metetdaksü.

Tasen Lai tasenba nungji France nunger handball champion Joël Abati aser Australia nunger high jumper Nicola Olyslagers na densema asaya balala nung mongintemi lemsatepba taküm kulitem-a densema lir.

Tasen Lai lema agütsütsü maparen nung yariteptsü atema

French Bible Society-i Christian sporting ministries aika ayongsemogo.

Tasen Lai edition tasenba dangji “More Precious than Gold” ajar aser iba ya 1 Peter: 7 ajanga ajungmesoba lir.

Olympics Games repringtsü atema nisung million 11 dak temai France yimtiba, Paris semdangtsü imlar. Olympics aser Paralympics naprong nung Tasen Laishibatemi lema agütsütsü. Iba asaya ya September 8 nü tembangtsü.

Mezüngbo French Bible Society-i French oshi nung Tasen Lai 100,000 aser English oshi nung Tasen Lai 30,000 lemsütsü tebilemba liasü saka aikati item Laishiba tasen aginüba agi French oshi nung Tasen Lai 140,000 aser English oshi nung Tasen Lai 60,000 lema agütsütsü renemogo, ta French Bible Society nung General Secretary, ta Jonathan Boulet-i metetdaksü.

metetdaksü.

Facebook page ajanga Arogoi, iba Tenla ki rongdokba ya takoksa tulu saka tamangertemi Amongnü shia tekülem sentong methitemi agia atatsü, ta metetdaksü.

“Zebulon United Methodist Arogo Tenla ki rongdokba agi onok melung raksar. Onok yaritsü atema adenshir ajak dang onoki pelar. Tenla ki rongdokbaji takoksa tulu saka nüburtemji Arogo lir. Tsüngrem temeim kübok onok longjema dang alitsü. Amongnü anogotem nung onoki gari anena ayuba tesem nung chair nung mener tekülem sentong agia atatsü. Tamangertem dang anepdang 9:30 ako nung arua Tsüngrem külemtsü metetdaksür. Yamai atalokyonga asen Kangki ajanga tarutsü anogotem sangwatsütsü,” ta Arogoisa metetdaksü.

ANOGO ABEN TSÜNGREM DEN

Ne kangki apuang

Idangji Yisui Pa nütsüngtem dang ashi, "Kari Kü sülen arunera, pai pei sasa azüokang aser pei kangki apur kü sülen arung. Mathi 16:24

Ne kangkiji kecha mashishi na asoshi Tsüngremi mulungba lir. Kangki aputsüba teshimetetba ka lir; ibai ne tashi dak alia masü. Na temang timtem alitsü akok mesüra tashi manga tanur alitsü akok saka ibaji kangki apuba den taitep. Tiaji mesüra ne mapa nungi adokbaji ne kangki masü. Ne kangkiji kecha taa makai tekümtet asoshi Khrista timatempa shilem agiba lir (Fil. 3:10). Pauli ashi tangar Khristan taküm nung tashi (mature) kümdaktsüba nung Pa timatempa nung pelar (Kol. 1:24).

Yisui Khrista sülen aotsü asoshi mezüngbuba pei sasa azüoktsüla. Tazüokba makai Khrista sülen anidaktsüba tamakoktsü. Tsüngremer talangzükba atalokdaksütsü asoshi idakji timtem kar lir. Tekümtet bener arutsü asoshi Khrista timatempa ama na meketa alirtem nem Tsüngremi tekümtet agütsütsü asoshi nai timtem kar aremzüktsüba lir. Nütsüngtemi Yisui Khrista ta mangatet tashi Yisui nütsüngtem den kangki indang mejembi (Matt. 16:21). Nai tamasa Yisui Khrista ta mangatet tashi nai kodanga kangki timtem maremzüktsü. Kodang nai Khrista den tesendaktep yangludir, Pai ne dang ne kangki sayutsü.

Kangki medeni Khristan yimsü mali. Timtem makai nai Khrista den tesendaktep akatsü atara mesüra ne mapang tajung atara, Khristaji ne taküm ta nai kodang meshitettsü. Na asoshi Tsüngremi mulungba nung kangki dena lir. Mezüngbuba, ne kangki apuang; idangji nai Pa anidaktsü.

Kari Trump khasetsü merangtsü, ta Pastor kati jelia shinzüka liasü



July 13, 2024 nü Butler, Pennsylvania nung election rally ka nung Donald Trump dak injang kaloktsüba sülen tangokba noksa nung angur. Telung noksa nung Brandon Biggs angur.

July 21, 2024: Tawa lanur kati taoba mapang US Tir, Donald Trump khasetsü merang, saka pa dak tenarong nung dang khashia liasü, ajisüaka taküm March ita nung pastor kati, kari Trump khasetsü merangtsü, ta jelia shinzüker liasü.

Pastor aser Youtuber kati jelia shinba video ji social media nung kanga prokshidar.

Iba ishika jakdang Pastor Steve Cioccolanti den interview ka nung jembidang Oklahoma nungi pastor aser Youtuber, Brandon Biggs-i nisung kari Trump khasetsü merangtsü ta shinzüka liasü.

July 13, 2024 nü Butler, Pennsylvania nung election rally ka nung Trump-i jembiba mapang nisung kati pa dak injang khaloktsü, ajisüaka injang jagi pa tenarong dang apeta khashia liasü.

Iba sülen Secret Service snipers-i Trump dak injang khaloktsüsang arrshi küm 20 lanur, Thomas Crooks khaset.

March 14, 2024 nü upload asüba video nungji Biggs-i pai Tsüngrem nungi mangdang anguba lemsatepa, nisung kari Donald Trump khasetsü merangtsü saka injangji teraong adena dang süitsü, ta

metetdakja liasü. Biggs-i, “Injangji pa tenarong adena süi, aser tekolak anasa süiba ajanga pa tenarong-a ajaktsüsa liasü. Iba mapang nungji pa ali nung temekok agi nendaka alang, iba sülen pai Kibuba külemba ni ngua liasü,” ta mangdang lemsatepa liasü.

Brandon Dale Biggs-i pa indang YouTube channel nung shin otem lemsateper. Paisa, taküm November ita nung Trump-i takok angutsü aser Yisui Khrista yakta arutsü ta Tsüngremi pa nem metetdaksüogo, ta lemsatepa lir.

AO OSHI ANGAZÜKDAK: TANÜ ANGAZÜKTSÜBA OJANG



Takar

(n) aika akaba, nüngdak ajak peria aliba (wealthy, rich)

* Takar aikati nübortem yarir.

Takbang

(v) mekabang, süng agi meküta sübang (fence in)

* onoki azü, ak aser an kidangi matutsüsa takbang.

OLONG PAITEP # 6852

Grid for crossword puzzle #6852 with numbers 1-17 indicating starting positions.

TIPLÉN

- 1. Nisung jenti - (5)
4. Tsük rudenba - (5)
6. Temzüng tesashi - (5)
8. S___i - (3)
9. Nisung rongnung telemsa - (3)
10. Anogoshi - (4)
12. Ajanga aor - (4)
13. Tsük rizüngdak - (3)
14. Tebang nungi adokba - (3)
16. Süngdong tatembangtiba - (5)
17. Meputep - (5)

LANGTSÜNGLEN

- 1. Tenük telong - (9)
2. Committee dang ajar - (5)
3. Yagi ki okdoker - (7)
5. Yim lenmang - (5)
7. Temoatsü keter meyipa aruba - (9)
11. Kanga junga menemba - (7)
12. Kenyongi majinü - (5)
13. Rong kanga tulu - (5)

OLONG PAITEP # 6851 TELANGZÜBA


TIPLÉN :

- 1. Tanga, 6. Wara, 7. Rajang,
9. Anük, 10. Jenjang, 11. Alar,
14. Ngashi, 15. Nala, 16. Mechi.

LANGTSÜNGLEN :

- 2. Anga, 3. Yabang, 4. Tarok,
5. Orak, 8. Ainer, 9. Anema,
10. Jabili, 11. Among, 12. Miim,
13. Anem.

NAI-A YA METETTER MA



Disneyland Paris-i Guinness World Record ka yanglutetogo aser ibaji "largest aerial display of a fictional character using drones" lir.

Disneyland Paris-i drones 1,571 amshia Mickey Mouse tekolak ka yanglua sayu aser iba nung drone show technology provider Dronisos ajanga yaritep.

Bastille Day benjung amongba tenüng nung Disneyland Paris-i drone light show ayonga agidang iba Guinness World Records title nguogo.

UNESCO World Heritage nung 'Moidams' züngsemtsü akok



Guwahati, July 21, 2024

(Agencies): Assam nung alemlü Ahom nunger aremba "Moidams" UNESCO World Heritage List nung dendaktsütsü atema International Council on Monuments and Sites (ICOMOS)-i shiogo.

July 21-31, 2024 anogotem New Delhi nung World Heritage Committee indang 46 buba session nung iba nomination reprangshitsü.

UNESCO heritage tenünga angutsü atema "Moidams" ahom chuba yimlir mang

nomination süogo aser iba ajanga Moidam indang putiotsü aser sobaliba jangjashitsü ta Archaeological Survey of India (ASI) züngsem Janhwij Sharma-i ashi.

"Moidam agizükba ajanga Ahom chuba yimli tali jangjaba dang masü saka Northeast India nung sobaliba takar alimai meteta akümtsü" ta World Heritage Committee chairperson Vishal V Sharma-i ashi.

"Moidams" ta ajaba ya Tai-temsäa lir. 2023-24 cycle atema

aremtsü atema amshiba liasü.

UNESCO World Heritage List nung züngsemra iba ya Northeast India nung cultural property mezüngbuba asütsü ta Sharma-isa ashi.

Delhi nung World Heritage Committee session alidang sobaliba sentong aser exhibitions balala agitsü. Iba ya Ministry of Tourism aser tanga ministry temi acha-ayanga agitsü.

World Heritage Committee session nung linük 150 nung teshimtet nübo 2,000 tema adentsü imlar.

Manipur nung KCP-MCP-i taoba züngsem ka khaset

Guwahati, July 21, 2024

(Agencies): Kangleipak Communist Party - Military Council (Progressive)-i parnok taoba züngsem ka khasetba atema tenüng agiogo.

KCP-MC(P) ajanga social media post ka nung iba osang metetdaksü.

Parnoki khasetba nisung ya arishi küm 30 tain Rajkumar Prithibi Singh liasü aser pa ya Imphal East district kübok Top Awang Leikai nunger liasü.

"Rajkumar Prithibi ya onok züngsem ka liasü saka pai party anema inyak aser drug shishilembaba nung shilem agi" ta KCP-MC (Progressive)-i ashi.

Honibar anüngdang Manipur police-i Takhel Ngaram road nung pa indang tasü mang angu aser iba sülen JNIMS hospital morgue-i bener ao.

Tasüsang tetsü RK (O) Shakuntala Devi-i lar jabaso tespetba atema aoksaba aser

jashiba metetdaksüogo.

"Iba tesempatsü mapa aitsür aser Joint Action Committee (JAC) ka tentogo" ta lai ashi.

"JAC-i temeten mangu tashi inyaktsü. Ozü jabaso tesüiba nung ozüng alema inyak aser police-i apuba chiok" ta Shakuntala Devi-isa ashi.

Pa taküm melenshir alitsü merandang kanga dang ajungbena pa tepsetogo. Pai pa kinungtsü aser tanur ana toktür süogo ta tetsüisa ashi.

Tripura nung BSF-i Bangladesh den arrtsü akangshir



Agartala, July 21, 2024

(Agencies): Bangladesh nung tensa mejungi akümba ajanga Border Security Force (BSF)-i Tripura nung Indo-Bangla arrtsülen security akangshiogo.

Tripura ya Bangladesh agi tesem asem tashi agi meketbanga lir aser tensa mejungi akümba ajanga security tsütsü tayongzükbatem ajurutsü ana nung dang lir.

Tripura-i Bangladesh den kilometer 856 international border lir.

"Bangladesh nung law & order tensa kanga majung lir aser iba ajanga BSF aser

Tripura atema tayongzükba aika bentsür arur" ta Tripura BSF IG Patel Piyush Purushottam Das-i ashi.

Bangladesh nung azünger India nunger kaketshir 8,000 shi anir arutsü atema tebilemtsü abener. Parnok teimba ka medical colleges nung azünger ta BSF-i ashi. Kaketshirtem ya Comilla, Brahmanbaria aser Dhaka nung teimba lir.

Kaketshir aika Integrated Check Posts (ICPs) aser Land Customs Stations (LCSs) ajanga India-i aruogo. West Tripura district kübok Agartala aser Sepahijala district kübok

Srimantapur ajanga parnok aru ta BSF-i metetdaksü.

"Yashi BSF-i kaketshir 365 anir aruba nung yaritep aser parnok 300 shi ka Srimantapur ajanga aru" ta parnokisa ashi.

ICPs ajanga kaketshirtem anir arutsü atema BSF-i maparen renema lir aser iba nung refreshments, food packets, transportation aser medical aid dena lir.

Tarutsü anogotem ano kaketshir aika arutsü imlar aser iba atema BSF-i akokba tashi yaritsü renema lir aser ketdangsurtem nem mapa lezmükja lir ta BSF-isa ashi.

Bangladesh SC-i quota timba agintsüogo

Dhaka, Chiteni/July 21 (Agencies): Bangladesh indang Supreme Court-i July 21 nü sorkar mapa mekazüka tokja aliba timba agintsüogo. Iba ajanga linük nung kaketshirtemi longkak ait tenzük aser nisung 130 dak tema tepsetogo.



Linük nung azütökshi lendong tulu ataloker lir aser ibayongji bendanger kaketshirtem aika linük toktsür aotsüsa küma liasü.

Mepetmesü tulu adokba sülen linük Supreme court-i, sorkar mapa shilem 30 mekazüka tokja aliba shilem 7 dang kümtsüogo. Mezüngbo 1971 küm nüjiso atema raraba nung shilem agiba chirnurtem nem sorkar mapa shilem 30 mekazüka toktsür liasü aser iba ajanga longkak aiterem aser security force tem tsüngda mangatetep tulu adok.

Osang ajanga ashiba agi, sorkar mapa shilem 93 merit dak ajemdaker agütsüta ta SC-i obendang agütsüogo.

Attorney-general A.M.

Amin Uddin-i news agency AFP dang ashiba agi, Supreme Court-i High Court-i obendang agütsüba ya ozüng alema lir ta shiogo. Attorney-General Uddin-isa, civil service shilem pongu rara nung shilem agiba chirnurtem atema asütsü aser tanga telok balala atema shilem ana mekazüka toktsütsü, ta ashi.

Supreme Court-isa, longkak aita aliba kaketshirtem dang class-i meyipa aotsü mepeshia metetdaksüogo

“Court-i kaketshirtem dang class-i meyipa aotsü mepeshia metetdaksüogo,” ta Shah Monjurul Hoque-i ashi.

High Court-i taoba ita, temepeshiba kar dak ajemdaker quota tem tanaben benokshiba

sülen tang SC-i iba tetuyuba ya agütsüogo.

Iba ken o dak sendakba nung linük ajunga nung tensa mejungi akümba sülen Bangladesh sorkari police aser military nem ‘shoot-on-sight’ order ka agütsü. Honibarnü nüburttem tenüngdakba osettem alitsü atema curfew benoker aliba khen atema agintsüba sülen iba tetuyuba ya agüja liasü.

PM Sheikh Hasina-i aniba sorkari Deobar aser Hombanü public holidays asütsü sangdongogo aser emergency services tem dang inyaksangshitsü melatsü. Nüburttem lijaliyongtsü atema curfew ya Deobarnü nikongtsütsü 3 ako nungi 5 ako tashi agintsütsü.

Brehostibarnü nungi asürtem timba küma aoba mapang ka nung Bangladesh sorkari linük ajunga nung curfew benoka military yokba den mepetmesü adoker aliba tesemtem nung internet service dena shibangtsüogo.

Office of the
DIMAPUR WATSÜ TELONGJEM
Dimapur - 797112 : Nagaland

DIMAPUR WATSÜ TELONGJEM AJANGA METETDAKTSÜR

Item tekübok agüja aliba Amitsür (Destitute Women) nenok teyari asoshi Dimapur Watsü Telongjem Kimen Wt. N. Sashila Mopungchuket Lengrijan 23rd July 2024 anepdang 9 AM shidak nung arutsü mepishir. Item documents bener arutsü metetdaksür. Destitute women Card, Bank AC Passbook Front page Xerox & Aadhar Card Xerox. Timba bener orr nenok ishika meji adadagi, iba anogo marura department nem meyipa agütsütsü ta metetdaksür.

SN	Name	F/H Name	Address
1.	Helen Jamir	Lt.Aosadang Jamir	Diphubar village
2.	Jemennaro Aier	Lt.Süpongmeba Aier	Island colony
3.	T.Anungla	Lt.Tamalepden	Bor Lengri H/N161
4.	Sangmennaro Ao	Lt.Chuba	Chumukedima
5.	T.Amongla	Lt.Wati Ao	Dimapur
6.	Temsüla Amer	T.Chujang	Chumukedima
7.	Mapuilenla	Lt.Sünep	Ao Kashiram
8.	Esther	Lt.Toron	Ao kashiram
9.	Imkongjungla	Lt.Nungdoktoshi	Nahabari
10.	Temjenpongla	Lt.Tsügikaba	Nahabari
11.	Inyaktola	Lt.Chubanokden	Diphubar
12.	Tiala Jamir	Imjung Jamir	Diphubar
13.	Ayangla Rangthan	Lt.Y Tsükyimkaba	Medzephema Town
14.	Wapangla Aier	Lt.Bendang	Nahabari
15.	Tsükilemla	Lt.Imkongsowa	Nahabari
16.	Tamongla	Lt.Wapang	Oriental colony
17.	Teyongmenla	Lt.Chuba	Dimapur
18.	Imnasangla	Satemkaba Tzüdir	Unity village 5 th Mile
19.	Helen Ao	Temjenkaba	Aoyimti H/N23 sec A
20.	Marjungla Jamir	Tiachuba Jamir	Aoyimti village
21.	Temjennungla Ao	Rolland Ao	Padumphukeri
22.	K.Yinsola	Kimüsü	Diphubar B

Sd/-
(Wt. Aoinla Jamir)
Tir, DWT
9856171163

Sd/-
(Wt. Akangrenla)
T/zülur, DWT
8729962555

Israel-i Yemen nung Houthi telok tamendakdak amak

Tel Aviv, Chiteni/July 21 (Agencies): Israel-i Yemen nung Houthi teloki azüoker aliba Temerem tzüyim nung rongnendak Hodeidah tesem makogo. Houthi puri Tel Aviv amakba sülen anogo ka lir Israel-i iba tesem makogo.

Defence Minister Yoav Gallant-i ashiba agi, Houthi movement nem osang tejangja ka agütsütsü atema par linüki iba jenjang agiogo.

“Hodeidah nung mi adoker aliba ya Middle East kübok tesem balala nungi ngudar aser onoki osang agütsünüba jangjaogo,” ta pai ashi.

Houthi telok den sendaktepaba aliba news outlet temi ashiba agi, Honibarnü iba tesem amakba sülen nung nisung asem süogo aser nisung 80 dak tema yiruogo. Kasa mapang nung Houthi telok nungi ketdangsür Mohammed Abdulsalam-i ashiba agi, Israel-i Yemen anema jenjang agiogo.

Deobar anepdang Israeli military-i ashiba agi, parnoki Yemen nungi khaketa yokba missile ka Israel indang air space adena mait tsüngda khadangogo.

Military-isa, Israel kübok Temerem tzüyim nung rongnendak Eilat nung air sirens agütsüogo, kechiyong missile teraksa iba tesem nung tsüktsü akok.

Abdulsalam-i ashiba agi, Gaza nung Palestine nunger pusemba anendaksütsü atema Houthi telok nongshitsü asoshi Israel-i anüing ajanga iba tesem makogo.



Tang mezüngbuba Israel-i telangzüba indang indanga agütsüogo aser ashiba agi, ita ishika tsüngda Yemen nungi drone aser missile noklang aika yoka Israel kübok tesem balala amakba atema iba telangzüba agütsüogo.

Hodeidah nungi noksa aser video balal ajanga Honibarnü nikongtsütsü mi tulu adoker aliba nguogo. Sanaa nung amenoker aliba Houthi sorkari ashiba agi, Israel-i tzüküm anasa totzü bendena ayuba tesem ka aser iba anasa power plant ka maka liasü.

Kasa mapang nung Israel Defense Forces (IDF)-i ashiba agi, “ita teku tashi Yemen nung amendaker aliba Houthi teloki anüing ajanga Israel amakba sülen IAF [Israeli Air Force] fighter jets temi linük nungi km 1,800 pilar Hodeidah tesem

nung Houthi kiralongrara military amendaker aliba tesem kar makogo.”

“Tesem mashi ka amaktsü atema IDF dak tashi lir aser Israel lendong nung toktsüba tashi ajak anema jenjang agitsü,” ta kasa sangdong ajanga ashiba den, Honibarnü nüngja “Outstretched Arm” liasü ta aashi.

Gallant-i ashiba agi, Israel nunger indang jet temi iba telok amak, kechiyong parnok Israel nunger nem timtem agütsü. “Houth teloki onok 200 ben dak tema makogo. Tang mezüngbuba parnoki Israel nunger ka yirutsü aser meyiper onoki parnok makogo. Onoki nüngdakba tesem ajak nung iba inyakyim ya benoka inyaktsü,” ta pai ashi.

Iba tesem amakba sülen

Honibar aonung o jembiba mapang Israel Ato Kilonser Benjamin Netanyahu-i, par linük kümzüka ayutsü atema takokba tashi jenjang agitsü, ta ashi.

“Shirnokisa onok yirutsüdir parnok anema onoki jenjang tesashi agitsü,” ta pai ashiba den Israel nungeri amakba iba rongnendak ya Iran nungi prangbong injang aser hadir balala bener aitba tesem tongtibang ka liasü, ta shisem.

Paisa, iba inyakyim ajanga Israel nunger tsükchirtem dang parnoki metongtetsüsa kecha tesem mali ta sayuogo, ta ashi.

Hokolbarnü Iran nung yangluba unmanned aerial vehicle (UAV) kati Tel Aviv nung flat block ka amak, ta Israeli military ketdangsür kati ashi. Iba UAV ya tesem talangka tonga yima aotsü

atema yanglushir liasü, ta ketdangsürisa shisem.

Houthi telokia iba tesem amakaba nangzükogo aser parnoki maneni tesem balala amaktsü ta tenangzükba agütsüogo.

Tel Aviv nung nung iba tesem amakba sülen arishi küm 50 tain tebur ka asü aser nisung ti yirua liasü. Iba nisungba ya tawa-ang Belarus nungi Israel-i aruba liasü.

Israel military ketdangsürtemi ashiba agi, parnok indang defence force-i drone aruba lazük saka aibelen ajanga khazüka meyok.

Taoba mapang Houthi teloki yokba missile aser drone ajak khadangogo aser ka danga Tel Aviv tonga marui liasü.

Houthi Supreme Political Council-i Honibarnü nikongtsütsü ashiba agi, iba tesem amakba atema parnoki telangzüba tapet agütsütsü.

Israel-i Yemen nung Houthi telok pur memaki liasü, saka US aser UK nati ita aika iba telok maka arudar. Gulf of Aden aser Temerem tzüyim nung shishilemba dang amshiba rongtem amakba anendaksütsü atema linük ana yagi iba jenjang agia arudar.

Houthi indang military-i mezüngbo parnoki Israel dak sendaka aliba rongtem mesüra Israel-i oya aliba rongtem amaktsü ta ashi. Ajisüaka parnoki amakba rongtem aika Israel den sendaktepa maliasü aser anüing ajanga iba telok amak tenzükba sülen parnoki UK aser US den sendaka aliba rongtem maka arudar.

Paes aser Vijay na Tennis Hall of Fame nung züngoksemogo



Leander Paes (ablen) aser Vijay Amritraj

Chiteni/July 21, 2024 (Agencies): Taoba mapang tarep asaya nung world No 1 asayar Leander Paes aser tennis broadcaster, actor, aser asayar Vijay Amritraj na Honibarnü International Tennis Hall of Fame nung züngoksemogo. Tena ya Asia nungi teburtem rongnung mezüngbuba Tennis Hall of Fame nung züngoksemogo.

Iba sentong ya Newport, Rhode Island nung agi, kong British tennis journalist aser author Richard Evans-a züngoksema liasü.

Paes aser Amritraj na ya India nungi Tennis Hall of Fame nung züngoksemer mezüngbuba lir. Sentong nung o jembiba mapang Paes-i pa lanuwa tennis masaya tsüngda football aser hockey asayaba bilemtetshia jembiba. Pai tebu (hockey captain) tsüngsü nung anidak Olympics nunga medal ka nguogo.

“Iba sabang legend tem den lemsatepsü maangka anguba ya tetushi tulu lir, shirnoki ni anogoshia ajungmesogo.. Nenoki Grand Slams akokba agi

masü, nenoki asayar jenjang yanglushitsüba agi masü saka nenoki ajaki asenok aliba lima tajungba kuma yanglushitsüogo,” ta Paes-i ashi.

“India nung chanu ka nem timla agütsüba atema nenok ajak dang kanga pelar,” ta paisa shisem.

Amritraj ya India nung rongnungi nungtugu tennis asayar ka lir aser pa 1970 nungi 1993 tashi asaya liasü. Pa asaya aliba mapang pai ATP singles titles 15 aben aser asaya 399 akokba den world rankings nung No.18 tonga asaya liasü. 1974 aser 1987 kum India team Davis Cup finals tonga asayaba mapang Amritraj-i tongtibang shilem agia liasü.

“Iba telok nung densemba atema ni kanga pelar aser kanga tushi bilemer,” ta Amritraj-i ashi.

Asaya nungi anenba sülen Amritraj humanitarian maparen balala nung shilem agia tennis asaya nung dang masü saka lenla aika nung pai shilem agiba ajanga temelenshi adokdaksüogo. Pai India nung ATP aser WTA asayamungtem

nongita asaya renloka aoba nung teyari agütsüogo. Iba den bendenloksema pa acting nunga shilem agia James Bond aser Star Trek movie franchises nung adokogo.

Kasa mapang nung arishi kum 51 tain Paes asaya aliba mapang pai tebur tarep asaya aser tarep temeyoktep asaya nung Grand Slam titles 18 tashi benogo. Pa aser Amritraj na Hall of Fame nung züngoksema sülen iba of Fame nung züngoksemer rongnung India linük 28buba kumogo

Paes-i tebur aser tarep temeyoktep asaya nung Grand Slams ajak kokogo. Pai 2012 kum Australian Open tebur tarep asaya akokba sülen Grand slam ajak akok aser 2016 kum Frfench Open akokba sülen tarep temeyoktep asaya nung Grand Slam ajak koka liasü.

Paes-isa, 1996 kum Atlanta Olympics nung Brazil nung asayar Fernando Meligeni koka bronze medal angu. Pai kija asaya nunga 1998 kum ATP title ka bener lir.

FC Goa-i lanur asayar Alan Saji alizükogo

Chiteni/July 21, 2024 (Agencies): FC Goa-i sangdong ka ajanga Reliance Foundation Young Champs (RFYC) academy nungi lanur asayar Alan Saji den kum ishika atema tenangzüktepba yangluba sangdongogo.

Kum aika atema tenangzüktepba yangluba sülen arishi kum 18 tain asayar ya taruba season Goa team nungi asayatsü.

Club nung adenba indang jembiba mapang Alan-i, “FC Goa nung adenba ya kü nükjidong atalokba ka lir. Ni asayar tejentem den training agia asayanüa liasü aser tang parnok den külemi renloka aotsü atema maangka anguba atema kanga pelar,” ta ashi.

Kerala nungi asayar ya arishi kum 12 asüba mapang nungi RFYC nung shilem ka liasü. Pa linük tenung nungi national aser international asayamung balala nung shilem

agiogo.

Pa takum kum tetenzüklen Japan nung Sanix Cup nung asayaba RFYC squad nung densema liasü. Iba asayamung ya Asia nung lanur asayamung tajungtiba ta züngshir aser linük balala nungi team tem arua iba asayamung nung shilem agir.

Iba asayamung nung kanga junga asayaba sülen Alan ya Sanix Cup Team nung züngoksema liasü aser pa India-i meyipa aruba sülena Reliance Foundation Development League (RFDL) nung Kerala Blasters aser Dempo SC indang U21 team den asayaba mapang goal idakja liasü.

FC Goa indang Head Coach Manolo Marquez-ia pa den tenangzüktepba yangluba atema kanga pela bilemba lemsatepogo. “Alan Saji ya sempet tajung aketba asayar ka lir aser pa tarutsü kanga tajung asütsü. Pa kanga takara, tasü

ait, kanga tesangra aser pai anung nung ball kanga junga asayateter.

“Pa kanga junga renlokogo aser pa sempet tali arangtetshitsü atema onoki pa nem sabang tajung ka agütsütsü. Pa jenjang ka nungji jenjang ka ta tanem tanemiang renloka aotsü saka pa tarutsü nung club atem dang masü saka India asoshi kanga tongtibang asayar ka akümtsü,” ta pai ashi.

“RFYC nung asayaba mapang Alan ya linük nung kanga jangrademtsü aketba asayatem rongnung ka kumogo,” ta RFYC otongdar kati ashi.

“Pai forward line nung mashi ka nung asayatetba ajanga pa dak senpet tajung aliba sayur. Alan atema onok kanga nema adanger aser FC Goa-i pa nem pa renloka aotsü atema sabang tajung ka agütsütsü imlar,” ta paisa shisem.

Eddie Howe Newcastle United nem bendanga agütsür lir

Chiteni/July 21, 2024 (Agencies): Newcastle United manager Eddie Howe-i ashiba agi, pa club nem bendanga agütsür lir aser pai inyaknuba mapang tashi mesüra pa aginüba mapang tashi iba club nung inyaktsü.

Gareth Southgate-i England coach mapa toktsüba sülen pai iba mapa belenzüktsü akok ta jembiba aliba mapang ka nung tang pai iba olen ya lemsatepogo.

Southgate ya 2016 kum nungi England team coach liasü aser England team European Championship final ana atonga tamakok anguba sülen pai coach mapa toktsütsü atema telemtetba agia liasü. Takum parnok final nung Spain-i 2-1 agi koka liasü.

England team len anitsü asoshi lisopurang ka shimtsü akok ta bilema aliba mapang Howe mesüra taoba mapang Chelsea coach Graham Potter nati England coach mapa belenzüktsü akok ta jembiba aruogo, ajisüaka parnoki bendanglen nungi coach anir arutsü atema asadangtsü akok.

FA-i ashiba agi, football industry nung open recruitment inyakyim atema parnok bendanga agütsür lir.

Coach atema asadangtsü asoshi bendangertem rongnungi Jurgen Klopp, Mauricio Pochettino aser Thomas Tuchel nung densema lir.

“Ni kü mulung nung tebilemba kecha maliasü aser ni idaki kü mapa nung bendanga agütsür lir,” ta Howe-i Hokolbarnü BBC Radio dang Germany nung Newcastle indang training camp nungi ashi. “Kü atemabo ni pela aliba tashi aser ni aginüa aliba tashi aser Newcastle nung ni meimba mapa sadem sadema inyakteta aliba tashi ni pela alitsü aser ni pela dang lir.

“Newcastle manager mapa abentsü ya tutushi aser maangka tulu lir. Iba mapa ni kum aika inyaktettsü imlar. Iba club atema takok marnok koktsütsü ni mulungteter lir,” ta Howe-i ashi.

England soccer governing body FA-i, Hokolbarnü head coach atema advertisement adoktsüogo aser candidate tem dang mapa asoshi careers portal ajanga apply asütsü metetdaksüogo.

FA-i iba mapa atema apply asütsü asoshi September ita Nations League metenzük tsüngda tatembangbuba anogoji August 2 asütsü latettsüogo.

Transfer osang: Ivan Rakitic Hajduk nung denogo

Chiteni/July 21, 2024 (Agencies): Taoba mapang Croatia nung international midfielder Ivan Rakitic-i Hajduk Split den tenangzüktepba ka yangluogo, ta club sangdong ka ajanga metetdaksü.

Saudi club Al-Shabab den tenangzüktepba yanglur aliba thitsüba sülen Rakitic taruba season atema Hajduk nung denogo.

“Croatian nung football asayar rongnung tajungtiba ka ayaterem atongtsü minute ishika lir Hajduk nungi season tatem tashi asayatsü asoshi tenangzüktepba ka yangluogo aser tenangzüktepba yanglushitsü atema lenmang sadema lapoka yuogo,” ya Hajduk Split-i sangdong ka ajanga metetdaksü.

Arishi kum 36 tain asayar ya mezüng Basel, Switzerland nung asaya aser iba sülen Germany nung Schalke 04 aser Sevilla na nungi aser Spain nung Barcelona nungi asaya liasü.

Barcelona nungi asayaba mapang pai UEFA Champions League kokogo aser Sevilla

nungi Europa League anaben kokogo.

Pa Croatia tenung nungi 106 ben asayaogo aser pai Russia nung 2018 kum World Cup nung silver medal anguba nung team nem teyari tulu agüja liasü.

Kasa mapang nung Newcastle United-i, Serbia club Jedinstvo Ub nungi arishi kum 19 tain defender Miodrag Pivas alizükogo.

Serbia nung asayar shiba box-to-box midfielder ka ama asayar pa mapang talangbaka Austria nung Siezenheim aser Grodig nung asaya aser taoba kum Jedinstvo nung dena liasü.

Maneni Belgium nung defender Thomas Meunier kum ana atema Lille nung denogo, ta Ligue 1 club yagi sangdong ka ajanga metetdaksü.

Meunier ya February ita Borussia Dortmund nungi Turkey club Trabzonspor nung oa aden. Pa taoba mapang Paris St Germain nungi asayaba mapang Ligue 1 title asem benogo aser 2018 World Cup nung bronze medal anguba Belgium team nung densema liasü.

BILEMDANGANG

"Teimla agi nisung ka tejakleni anir."